

आकाशवाणी

खबरां ----

1. प्रधानमंत्री नरेंद्र मोदी होरें अज्ज ईरान दे राष्ट्रपति हुंदे नै गल्लबात कीती ते इजराइल कन्नै ओहदी बनी दी तनोतनी आहली स्थिति पर गैहरी चिंता प्रगट कीती।
2. ईरान नै ओहदे त्रै परमाणु संयंत्रें पर अमरीकी फौजी हमलें दी सख्त निंदा कीती ऐ, संयुक्त राष्ट्र महासचिव होरें बी इस कार्रवाई गी मंदे भागें आहली घटना करार दिंदे होई इसी पच्छिम एशिया दे हालात लेई खतरा दस्सेआ ऐ।
3. अंतरराष्ट्रीय परमाणु उर्जा एजेंसी IAEA नै ईरान दे मजूदा हालात दी पछोक्कड़ै च कल इक अपात बैठक सदी ऐ।
4. इजराइल ते ईरान दौनें अज्ज इक-दुए पर होर मिसाइली हमले कीते न।
5. आपरेशन सिंधु तैहत अजें तोड़ी 1 जहार 117 भारतीयें गी ईरान थमां सुरक्षित मुल्ल वापस लेई आंदा गेआ ऐ।
6. एन.आई.ए नै पहलगाम आतंकी हमले च शामिल आतंकवादिणं दी मदद करने आहले 2 जनें गी गिरफ्तार कीता ऐ।

<><><><><><>

PM Modi-Iran Prez.

प्रधानमंत्री नरेंद्र मोदी होरें अज्ज ईरान दे राष्ट्रपति मसूद पेजेशकियन कन्नै गल्ल कीती ते ईरान ते इजरायल बश्कार हाल च बधी गेदे तनाऽ पर गहरी चिंता व्यक्त कीती। इक्क सोशल मीडिया पोस्ट च श्री मोदी होरें दस्सेया जे गल्लबात दौरान मौजूदा स्थिति बारै विस्तार कन्नै चर्चा कीती गेई।

प्रधानमंत्री होरें तत्काल तनाऽ घट्ट करने, गल्लबात ते कूटनीति राएं क्षेत्रीय शांति, सुरक्षा ते स्थिरता दी बहाली दा आह्वान कीता।

<><><><><><>

Iran Attack Reactions

इजराइल दे प्रधानमंत्री बेंजामिन नितेनयाहू होरें अमरीका दे राष्ट्रपति डोनाल्ड ट्रंप होरें गी ईरान दे परमाणु ठकानें पर हमला करने पर बधाई दिती ऐ। उनें ट्रंप हुंदे इस फैसले दी सराहना करदे होई इक वीडियो जारी कीता ऐ ते आखेआ ऐ जे एहदे नै इतिहास बदली जाग। नितेनयाहू होरें आखेआ जे आपरेशन राइसिंग लायन तैहत इजराइल नै बड़ा शैल ते सराहने जोग कम्म कीता ऐ। तोआई संयुक्त राष्ट्र महासचिव अंतोनियो गुतरस होरें ईरान पर अमरीकी हमले गी खतरनाक करार दिंदे होई सौहगा कीता ऐ जे इस हरकत करी पच्छिम एशिया च हालात काबू शा बाह्न होई सकदे न ते एह अंतर्राष्ट्रीय शांति ते सुरक्षा लेई बड़ा बड्डा खतरा ऐ। तोआई ईरान दे विदेश मंत्री सईद अब्बास अराघची होरें देश दे त्रै परमाणु संयंत्रें पर अमरीकी फौजी हमलें दी सख्त निंदेआ कीती ऐ। उनें अमरीका पर संयुक्त राष्ट्र चार्टर, अंतरराष्ट्री कनून ते परमाणु अप्रसार संधि दी खलाफवर्जी करने दा आरोप बी लाया ऐ। उनें आखेआ ऐ जे इनें हमलें दी खतरनाक नतीजें दी बी चेतावनी दिती ऐ।

<><><><><><>

Indian-Navy Tamal

भारती नौसेना अगले म्हीने दी पैहली तरीक गी रूस दे कलिनिनग्राद च अपने भलेआं अज्जै-कल्लै दिएं स्टीलथ मल्टी रोल फ्रिट गी समुंद्री बेडे च शामिल करोग। पच्छमी नौसेना कमान दे फ्लैग आफिसर कमांडिंग-इन चीफ वाइस एडमिरल संजय जे सिंह कई वरिष्ठ भारतीय ते रूस दे रक्षा अधिकारियें दी मौजूदगी च मुख् अतिथि दे रूप च समारोह च मौजूद रौहडन्न। रक्षा मंत्रालय दे इक बयान च आखेआ गेआ ऐ जे पिछले दो दशकें च रूस थमां शामिल कीते गेदे क्रिवाक श्रेणी दे फ्रिगेट दी श्रृंखला दा अट्टमां ज्हाज ऐ।



Israel-Iran Attack

अमरीका आसेआ कल कीते गेदे हमले पर चपे दे ईरान नै जवाबी कार्रवाई करदे होई अज्ज इजराइल दे 10 शैहरें गी नशाना बनांदे होई ब्हाई हमले कीते न जिंदे नै आले-दोआले दे इलाकें च बड़ा मता डर-त्राह फैली गेदा ऐ। ईरान दी तरफा हमला तेज कीते जाने दे बाद इजराइली एयरपोर्ट अथार्टी नै इजराइल दे एयर स्पेस गी पूरी चाल्ली बंद करी दित्ता ऐ। ईरानी हमलें दे बाद जवाबी कार्रवाई करदे होई आई.डी.एफ नै पच्छमी ईरान च कई फौजी ठकानें गी नशाना बनांदे होई हमला कीता ऐ। अज्ज बडुलै इजराइली ब्हाई फौज नै ईरानी हथियारबंद बलें दे सैनिकें पर हमला कीता। ईरान नै जेड़ा अज्ज “आपरेशन टू प्रामिस थ्री” तैहत इस बरे दा सब्बनें शा बड्डा मिसाइली धमाका कीता। ओह्दे च बेन गुरियन ब्हाई अड्डे, जैविक अनुसंधान केंद्रें ते कमांड एंड कंट्रोल सुविधाएं गी नशाना बनाया गेआ ऐ। हरइफा च ईरानी मिसाइलें कन्नै घट्टोघट्ट 23 लोकें दे घायल होने दी खबर ऐ जिसलै जे हमले दौरान कर्मिल च इक महिला दी दिलै दा दौरा पौने कारण मौत होई गई।



Air India Bomb Rumour

ब्रिटेन दे बर्मिंघम थमां दिल्ली आ रदे ब्हाई ज्हाज च बम होने दी धमकी दे बाद ज्हाज गी रियाद बक्खी मोड़ी दित्ता गेया ते इमरजेंसी लैंडिंग कराई गई। एयर इंडिया नै दस्सेआ ऐ जे फ्लाइट ए.आई-114 रियाद च सुरक्षित तोआरी दित्ता गेआ ते एहदी सुरक्षा जांच कीती गई जेड़ी अफवाह निकली। एयर इंडिया नै दस्सेआ ऐ जे सब्बै यात्री सुरक्षित ना।



IAEA

अंतरराष्ट्री परमाणु उर्जा एजेंसी IAEA नै आखेआ ऐ जे ईरानी परमाणु ठकानें पर अमरीका दे ब्हाई हमलें दे बाद दी स्थिति दी समीक्षा लेई कल इक आपात बैठक सद्दी ऐ। उआं एजेंसी दा आखना ऐ जे अजें फिलहाल अमरीका आसेआ कीते गेदे हमलें दे बाद कुसै चाल्ली दी परमाणु रिसाव दी जानकारी नेई ऐ। एजेंसी दे प्रमुख राफेल ग्रोसी होरें आखेआ जे एह हमला इक बड्डे खतरे बक्खी इशारा करदा ऐ ते इस चाल्ली दी कार्रवाई कोई खरी गल्ल नेई ऐ। इजराइल दे परमाणु ठकानें पर अमरीकी हमले पर अपनी पैहली प्रतिक्रिया दे बाद IAEA नै कल इक अपात बैठक सद्दी ऐ जेदे च मजूदा हालात कन्नै निब्वड्डने बारै सलाह-सूत्र कीता जाग तां जे दुनिया गी कुसै बड्डे खतरे कोला बचाया जाई सकै।

<><><><><><>

PM-Yog

प्रधानमंत्री नरेंद्र मोदी होरें योग गी जीवन दा अनत्रुट हिस्सा बनाने ताई आंध्र प्रदेश दे लोकें दी सराहना कीती ऐ। कल विशाखापत्तनम च 3 लक्ख शा बद्द लोकें कन्नै अजे तगर दे सब्बनें शा बड्डे योग अभ्यास दा गिनीज वर्ल्ड रिकार्ड सांझा करदे होई श्री मोदी होरें आखेआ जे योग आंध्र प्रदेश ते विशाखापत्तनम दा कार्रक्रम नेकें लोकें गी बेहतर सेहत ते भलाई बेहतरी आस्तै प्रेरित करोग। प्रधानमंत्री होरें आखेआ जे योग इक बारी परतियै लोकें गी कन्नो-कन्नी लेआंदा ऐ।

<><><><><><>

Amit-Shah-Chhatisgarh

गृह मंत्री अमित शाह छत्तीसगढ दे दऊं दिनें दे दौरे पर रायपुर पुज्जी ना। इस दौरान अज्ज उनें राजधानी रायपुर ते नारायणपुर जिले च बक्ख-बक्ख कार्रक्रम च हिस्सा लैता। गृह मंत्री होरें अज्ज रायपुर च राश्ट्री फोरेंसिक विज्ञान विश्वविद्यालय ते केंद्री फोरेंसिक विज्ञान प्रयोगशाला दे परिसर दा नीह पत्थर रक्खेआ। एह फोरेंसिक विज्ञान विश्वविद्यालय 40 एकड रकवे च करीब 400 करोड रपे दी लागत कन्नै बनाया जाग। श्री शाह होरें अज्ज रायपुर च छत्तीसगढ ते गोआंडी राज्यें दे पुलस

महानिदेशक ते अतिरिक्त पुलस महानिदेशकें कन्नै सुरक्षा सरबन्धी मुद्दे पर बैठक बी कीती। इक्क होर बैठक च केंद्री गृह मंत्री होर वामपंथी अतवाद पर सुरक्षा दी समीक्षा बी करा करदे न।

<><><><><><>

Op. Sindhu

आपरेशन सिंधु तैहत तकरीबन 1117 भारतीयें गी ईरान थमां सुरक्षित वापस लेआंदा गेआ ऐ। विदेश मंत्रालय नै आखेआ ऐ जे कल राती मशाद थमां इक्क खास ज्हाज 290 भारतीयें गी लेइयै नमीं दिल्ली पुज्जा हा। कल संझा मशाद थमां गै 310 भारतीयें गी लेइयै इक होर दुआ ज्हाज दिल्ली आया हा। तोआई, नेपाल ते श्रीलंका नै आपरेशन सिंधु तैहत ईरान थमां उन्दे नागरिकें दी वापसी च मदाद ताई भारत सरकार दा धनवाद कीता।

<><><><><><>

Special-Feature

राश्ट्र सेवा सुशासन ते गरीब कल्याण दे सिद्धांतें थमां प्रेरित होइयै इक्क दाहके च टकोहदा बदलाव दर्ज कीता गेआ ऐ। आकाशवाणी समाचार तुंदे लेई पिछले 11 बरें च मुख् क्षेत्रें च सरकार दियें कोश्टें पर इक्क फीचर लेइयै आया ऐ। अज्ज अस्स भारत दी उर्जा क्रांति दी गल्ल करा रदे आं जेडा के सुधारें, रिकार्ड क्षमता, बाद्दा ते साफ-सुथरी भरोसेमंद ते समावेशी उर्जा ताई इक्क निग्गर कोश्ट दा दाहका ऐ। पिछले इक्क दाहके दरान भारत दे उर्जा खेत्र नै बदा रदी मंग, मुख् बुनियादी ढांचे दे विकास ते रिवायती सने नमीकरण उर्जा दे स्रोतें, दौनें आस्तै मजबूत नीति, समर्थन करियै बाद्दा दिक्खेआ गेआ। जून 2025 तगर देसै दी कुल स्थापित उर्जा क्षमता 476 गीगावाट तगर पुज्जी गई। शडा नमीकरण उर्जा दे 226 गीगावाट दे योगदान कन्नै भारत हून सौर उर्जा च त्री थाहर ते पवन उर्जा क्षमता च चौथी थाहरै पर ऐ। देस नै अप्रैल 2018 तगर 100 प्रतिशत ग्राएं मोहडें दा बिजलीकरण हासल करी लैता ते अदूं थमां 2.8 करोड़ शा बद्द घरें गी ग्रिड कन्नै जोड़ेआ गेआ ऐ। पी.एम सूर्य घर योजना देश

भर दे घरें गी रौशन करा'रदी ऐ जिल्ले के पी.एम कुसुम योजना सौर उर्जा कन्नै चलने आहली सिंचाई रायं करसानें गी सशक्त बना करदी ऐ।

<><><><><><>

NIA-Arrests

राश्ट्री जांच एजेंसी - एनआईए नै पहलगाम च 26 बेदोसे सैलानिएं दी हत्तेआ च शामिल आतकवादिएं गी आसरमा देने आहले द'उं दोषिएं गी गिरफ्तार कीता ऐ। इ'दी पन्ध्यान बटकोट दे परवेज़ अहमद ते हिल पार्क पहलगाम दे बशीर अहमद दे तौर पर कीती गेई ऐ। इ'दें दौनें दोषिएं, बुजदिलाना पहलगाम आतंकी हमले गी अंजाम देने आहले आतंकवादिएं दी पन्ध्यान बी कराई दिती ऐ ते इ'नें इब्बी दस्सेआ ऐ जे पहलगाम आतंकी हमले च शामिल त्रवै आतंकवादी, पाकिस्तानी हे जेहडे लश्करे तैयबा गुट लेई कम्म करदे ना। इ'नें दौनें दोषिएं दी गिरफ्तारी गी पहलगाम आतंकी हमले दी जांच च बड़ा महत्वपूर्ण मन्नेआ जा'रदा ऐ।

<><><><><><>

Properties-Attached

आतंकवाद ते राश्ट्र बिरोधी तत्वें खलाफ इक्क महत्वै आहली कार्रवाई करदे होई कुपवाड़ा जिला तैहत मकामी पुलिस नै मोनबल हंदवाड़ा दे 2 जनें दियां अचल संपत्तियें गी जब्त कीता ऐ। एह दौनें लम्में चिरें सवां आतंकवाद कन्नै सरबंधत इक्क बकाया मामले च आरोपी ना। जिनें आरोपियें दिएं संपत्तियें गी जब्त कीता गेआ ऐ, उंदे च मोहम्मद शफी बारा पुत्र सावरिया बारा ते गुलाम मुस्तफा पुत्र अलिफउद्दीन ऐ, दौनें मोनबल हंदवाड़ा दे बसनीक दस्से जा करदे ना। एह दौनें घुसपैठ करियै पाकिस्तान चली गे हे ते अदूं थमां गै आतंकवाद गी बढ़ावा देने, बन्ने पार थमां आतंकी गतिविधियां चलाने ते इलाके च नेकें आतंकी घटनाएं गी अंजाम देने च सक्रिय तौरा पर शामिल ना।



Cricket T-20 World Cup

कनाडा नै मर्दे दी आईसीसी टी-20 विश्व कप 2026 आस्तै क्वालीफाई करी लैता ऐ। एहदी मेजबानी भारत ते श्रीलंका करडन। अमरीका क्षेत्र क्वालीफायर च बहामास पर शानदार जित्त दे बाद कनाडा नै अपना थाहर पक्की करी लैती ऐ। एहू टूर्नामेंट च औहदी लगातार पंजमीं जित्त ही। एहदे कन्नै गै कनाडा 20 टीमें च टूर्नामेंट च पैहले थमां गै क्वालीफाई करी चुकी दी 13 टीमें च शामिल होई गेआ ऐ। एहदे च भारत ते श्रीलंका दे अलावा अफ़गानिस्तान, ऑस्ट्रेलिया, बांग्लादेश, इंग्लैंड, दक्षिण अफ़्रीका, अमरीका, वेस्टइंडीज़, आयरलैंड, न्यूज़ीलैंड ते पाकिस्तान शामिल ना। खीरी 7 स्थान 2025 दे खीरै च क्षेत्रीय क्वालीफ़ायर राएं भरे जाडन। इन्दे च यूरोप ते अफ़्रीका थमां दो-दो ते संयुक्त एशिया-पूर्वी एशिया प्रशांत क्षेत्र थमां त्रै टीमां शामिल होडन।



Defence Min.

रक्षा राज्यमंत्री संजय सेठ कल्लै थमां इस म्हीने दी 26 तरीक तगर केन्या ते मेडागास्कर दे दौरे पर रौहंगन। यात्रा दे पहले गेड च श्री सेठ होर कल ताइता-तवेता काउंटी च स्मारक स्तम्भ दे सांझे अनावरण आस्तै केन्या जांगन। उत्थे गै दौरे दे दुए चरण च राज्यमंत्री 26 जून गी एंटाना नारिवो च मेडागास्कर गी आजादी दी 65मीं बरे गंड ते मालागासी हथियारबंद बलें दे गठन समारोह आस्तै मेडागास्कर दा दौरा लाडन।



Motivational-Lecture

नौजोआनें च अनुशासन, देशभक्ति, पक्के धेइयै दी भावना पैदा करने ते उनेंगी राष्ट्र ताई सकारात्मक योगदान देने सने तरक्की बाद्दे दे मौकें दे तौरा पर चुनौतियें गी स्वीकार करने लेई उनेंगी प्रोत्साहित

करने दे मकसद कन्नै भारतीय सेना नै प्रेरक लैक्चर दा सरिस्ता कीता। एहदे च कर्नल योगेश चौहान सी.ओ 4 आर.आर होरें पावर प्वाइंट प्रस्तुति राएं असरदार लैक्चर दित्ता। कार्जक्रम च जम्मू यूनिवर्सिटी दे भद्रवाह कैपस दे 250 विद्यार्थियें सने अमले नै बी शिरकत कीती।

<><><><><><>

SANJY

इस बरै आहली श्री अमरनाथ जी दी सालाना यात्रा गी रम्भ होने च तकरीबन 11 दिन बचे देन ते होरनें थाहरें आहला लेखा बांदीपुरा जिले दे शादीपोरा ट्रांजिट कैप च बी तैयारियां चला करदियां ना बांदीपोरा दे डी.सी मंजूर अहमद कादरी होरें दस्सेआ जे यात्रुएं गी दित्ती जाने आहलियें स्थूलतें गी मुकदा रूप दित्ता जा करदा ऐ। कैप दे अंदर बाहर ते आले दोआले सी.सी.टीवी निगरानी बदाई दित्ती गेई ऐ।

<><><><><><>